



LALANA LAH. 2014-006
Mikasika ny ady amin'ny heloka eo amin'ny fitaovan-tserasera

And. 22 – Ny tahirin-tsary mamofady mahakasika ny ankizy na ny endrika tahirin-tsary mamofady mampiasa ankizy isan-karazany, na inona na inona fitaovana ampiasaina, ka ahitana ankizy mandray anjara amina hetsika ara-nofo, tena misy na noforonina, na ny fanehoana ny fitaovam-pananahan'ny zaza mba hikendrena ny lafiny ara-nofo.

Antsoina hoe “ankizy” ny olona rehetra latsaky ny valo ambin'ny folo taona.

Ny hetsika rehetra kasaina haparitaka amin'ny alalan'ny fitaovana informatika na elektronika, na ny fitanana, na ny fandraiketana, na ny famokarana, na ny fakana na fampitana sary na fanehoana ankizy ka manana endrika mamofady dia hiharan'ny sazy roa taona ka hatramin'ny dimy taona an-tranomaizina, miampy lamandy 2 000 000 Ariary ka hatramin'ny 10 000 000 Ariary.

Ny fikasana fotsiny ihany dia handairan'izany sazy izany ihany koa.

Iharan'izany ihany koa ny fanomezana na ny fanaparahana sary na ny mitovy endrika aminy, amin'ny alalan'ny fitaovana informatika na elektronika, na eto an-toerana na any ivelany, ny fampandefasana azy eto an-toerana na any ivelany.

Ny fijerevana matetika ireny sampam-pifandraisana ho an'ny sarambambahoaka izay maneho ireny sary na ny mitovy endrika aminy ireny, na ny fitazonana sary na ny mitovy endrika aminy, na inona na inona fitaovana ampiasaina, dia hiharan'ny sazy roa taona ka hatramin'ny dimy taona an-tranomaizina, miampy lamandy 2 000 000 Ariary ka hatramin'ny 10 000 000 Ariary.

Ny sazy dia mety hihatra telo taona ka hatramin'ny folo taona an-tranomaizina miampy 4 000 000 Ariary ka hatramin'ny 20 000 000 Ariary, raha toa ka zaza tsy ampy taona latsaky ny 15 taona no hita ao.

Ny sampam-pifandraisana ho an'ny daholobe dia mivelatra amina fanaparahana ny tahirin-kevitra tsy manana endrika fifandraisana mikatona, na fitaovam-pifandraisana elektronika mampiasa ny tambazotra aterineto izay ahazoan'ny mpandefa sy ny mpandray mifanakalo mivantana na tsia ny fampahalalana rehetra.

Ny fepetra rehetra voarakitra ato anatin'ity lalàna ity dia azo ampiharina amin'ireo sarin'olona mamofady rehetra ka ahitana endrika ara-batan'ankizy tsy ampy taona, raha toa ka tsy voaporofa fa feno valo ambin'ny folo taona amin'ny fotoana nandraketana ny sary ilay ankizy.

Voasokajy ho isan'ny sary mamofady ireto:

- 1) Ny sary na ny fanehoana zaza tsy ampy taona maneho fihetsika mamofady ;
- 2) Ny sary na ny fanehoana olona manana endrika tsy ampy taona ka maneho fihetsika mamofady ;
- 3) Ny sary namboarina maneho zaza tsy ampy taona maneho fihetsika mamofady ;

Ny hoe sary namboarina eto dia maneho ny sarin'olon-tsootra novaina endrika tamin'ny alalan'ny fitaovana informatika.